

孫徵君日譜錄存

孫徵君日譜錄存卷之三十三

康熙十三年甲寅九十二歲

正月

後學

通州詹武陟王

校訂

初一日

谷孫徵君日譜錄存卷之三十三

晨起拜 天地祖先往歲一人掖之而起今子孫人

掖之始能起因誦康節先生焚香告天詩亦爲一

詩貽湯孔伯以孔伯視余九十文以康節擬余也

康節安樂渾造道司馬精神整日書此語頗窺其

微 我於古人審所從生平最愛堯夫叟先生生

當全盛時羣賢功業乎何有不事王侯鑄羣賢搏

挽乾坤道在手興來爲吟自在詩客至且飲歡喜
酒林間高閣望中希花外小車不來久焚香每誦
告天詩先生心事昭泰斗外王內聖此一身安老
懷少而信友湯子擬我愧非倫先生敬不敢偶
懷古詩成欲寄君曉起東風儼在柳

初二日

邀尹芝仙周春雨二公以詩代柬 我生前甲申甲
寅九十一生平鮮嗜好有友願已畢浮家山水間
所幸得二逸尹君彥明裔妙得琴中秘仙乎復仙
乎春雨真堪述周公邑侯父道氣凌凌非披琴時

一彈走筆皆音律星聚此山中田家丁釀秫鶴背
望聯翩願期此人日

初三日

賦得窮巷兩簞瓢 窮巷兩簞瓢李生與劉子劉子
產江南李生來北地所遇固非時文能採妙理曠
足因鹽車自徭深所恥山水借不孤衰髦得

初四日

或問軍興無人不騷動此時學問應如何曰古人無
事嘗若有事有事卻如無事禹之行水疏濬決繫
皆是應如何而如何所以謂之行其所無事果能

行所無事天闕地陷皆定數也不能行所無事鵲
噪鴨鳴皆異事也唐虞揖讓三盃酒湯武征誅一
局棋水到渠成易云天下何思何慮此是學問第一義

初十日

草堂小集詩 稿存原本

十一日

二尹子說 稿存原本

十二日

祝程太守 稿存原本

十三日

輓裴杞初 稿存原本

二月

十一日

祝冀渭公 稿存原本

十二日

與崔大酤 稿存原本

二十七日

復崔玉階書 稿入集

二月

初三日

復宋與瞻 書入集

初四日

復熊伯遇 書入集

十五日

先正云添一箇喪元氣進士不如添一箇守本分平

民余謂添一箇孝子仁孫勝添一箇狀元宰相此

語人多信不及信得及便知孔顏之所以樂

十六日

老夫生平無他嗜好少年以俱存無故爲樂壯年以

兄弟友朋爲樂老來以兒孫師弟爲樂此三樂者
真無窮極也人人有此受享人人不能受享

十七日

富貴貧賤均一非道也一則不處一則不去抑之而
乃以相平相平則失其所重鹿江村貧字兒抬舉
人是從不去非道之貧賤看出千載下貧字兒有
多少光彩

二十日

和李岫旭韻 病臥攤書差足娛到門老友起房軀
易從未畫機誰識琴到無絃調自孤添消他年留

東脯乾坤此日供飛芻素心相對忘晨夕久訝烟霞舊茲濡

二十八日

語張子發曰君子進德修業之事總是人情世故之事人情世故不諳而曰吾進吾德吾修吾業於何處見德之進業之修哉忠信所以進德修辭立其誠所以居業一忠誠盡之矣

四月

初二日

爲知還堂集序 稿入集

初三日

恭儉美德也然不可以聲音笑貌爲恭而以聲音笑
貌爲之則爲大機械儉而以聲音笑貌爲之則爲
真鄙吝堯之允恭克讓光被四表格於上下總一
恭德之洋溢也禹之無間然美服冕孝鬼神盡溝
洫總一儉德之發皇也恭儉之時義大矣哉

初五日

顯親揚名孝之大者人子皆知之然使親爲貴人之
親何如使其親爲賢人之親聖人之親孔夫子之
封啟聖公周程張朱能令其親配饗啟聖此是第

一等顯揚者

初八日

語王爾韜曰孟武伯問孝夫子何不曰親有疾子宜
用心調養以瘳厥疾乃曰父母惟其疾之憂此語
有多少打動人子處人子體此意而謹疾守身當
下便可升堂入室爾韜有徵疾其父玉卿爲之問
方理藥因以此語之憶韓康伯有疾遇神人之言
日當三服

十六日

入自勉 自憤 自排 自反 自責 自修 自

進 自得 自成

八自戒 自暴 自棄 自用 自專 自矜 自

誇 自私 自利

一戒一勉爲學始終之道盡是矣時時刻刻勿忘此
言不患不升堂入室也

八自勉總之一能自反八自戒總之一勿自用一勉
一戒能深造不已則自得矣此之謂自成功不到
無不明掘井九仞虧於一簣不及泉猶爲棄井也
今日之勉只算的今日事明日之戒只算的明日
事文王望道未見孔子於我何有終其身只有一

自勉而已矣

二十四日

寄吳稜季書 稿入集

二十八日

韻兒讀唐史錄其人物之最著者數十人問誰當第一曰人各有賞識老夫生平最服狄梁公梁公事女主艱危動忍卒能返周爲唐功最大而心獨苦故第一老夫之所以醉心梁公者爲其能包容女至不沾沾自求潔身能忍人之所不能忍然又在婆師德包容中而已不自知師德久爲將相獨能

以功名終亦人傑矣哉賞鑒古人全爲對症自巳
故獨有取於二老

五月

初五日

與浩溥沐浴溶溶漢暨用楨曰憶昔汝祖父讀書江村
一時應童子試者六人伯順謂余曰郎君等不必
俱發科登仕只本分孝弟力田思不失前輩書香
便是天地間第一等人家今言猶在耳老夫倏忽
九十一歲曾孫應考者六人歸而錄其文令余觀
余曰江村老友已代余命爾之祖若父矣爾等第

奉此言以往便是孝友堂佳子弟

十一日

答李梅村問學書 稿入集

十二日

與劉一六郭公望兩社友論風俗 子曰里仁爲美
紫陽以里有仁厚之俗爲美余謂仁厚多端大要
以子孝婦節爲重節孝多則仁厚莫美於此節孝
少則不美莫過於此余少時見六院出巡莫不首
重節孝真有司月兩至鄉約所講聖諭聞有節孝
事則扇以旌之表行所以勵俗也節孝之所以自

處何嘗計人之知不知官家之旌不旌吾僑爲世
道計自當闢幽以詔後世或式其閭里或聞諸有
司或書諸史冊或紀之文集馨潛德於其子孫此
之關係何如余之所期於一六者以劉文靖自處
所期於公望者以郭林宗自處二公皆能維風易
俗者因聞余言而有當否

十三日

知廉勇藝四子各據之各成一人家歸於夫子之禮
樂則成一家矣六言六蔽六行各成一人家歸
於夫子之好學則成一家矣猶之吏戶禮兵刑

工六部各成一人家總而歸之於君若相則成一家
大家矣兩京十三省各成一人家合之於一代之
君則成一家矣唐虞三代漢唐宋六朝五代各
成一人家歸之於元會則宇宙只是一家人今之
談學者朱陸之尊德性道問學分爲兩家晦菴陽
明之格物分爲兩家此等處恐終難証孔聖之學
而入堯舜之道衰年日日臥牀偶書此聊以遣病
十五日

君子小人兩不相容不獨小人不能容君子君子亦
不能容小人不相容未有不和敗者安石新法之

行滿朝攻之不遺餘力明道曰新法之爲民害乃
吾黨激成之劉元城曰金陵亦常人而稱其善而
并以爲惡則人不信使當時諸君子多如二公之
恕則宋室之禍應不如是之慘小人不足深咎吾
深爲攻小人者惜之天啓時璫禍之慘亦諸正人
激成之高陽曾云攻內魏宜少寬外魏攻外魏宜
少寬內魏一時並攻彼勢相合禍且立至此諸君
予之失也

十七日

明道令人不忍欺只此一語誠能動物令人醉心故

伊川每云此某不如家兄處司馬君實劉元城皆其私淑之人而歸田之口溫公遺像富及畫工而爭炷元城者香價湧貴皆至誠一念通乎神明貫乎晝夜非可以襲取而僞爲也嘗見朴實一流人縱有疎失而天地鬼神鑒之天下後世信之彼姦凶輩智巧百出而得罪鬼神乃更甚故人非無才之患而不誠之患

十八日

兼山堂語錄 性一誠也誠一勿欺也聞達之辨五霸之分總之一誠不誠而已誠則爲集義不誠則

爲義襲集義所生心逸日休義襲而取心勞日拙

十九日

與崔玉階云自今天子宰相皆有好學之意足下以
二三君子欣沃於其間則學之興也在指顧間矣
況國子監興學之地貴門生興學之人此番選拔
天下之人俱在斯文未喪足下豈無意乎

二十日

容城趙玉峯使君以卓異行取吏部監士民形之碑
文志思諸紳士以衰朽受塵外之知以碑文相囑
衰朽亦不忍以不文辭也扶病數言見我仰止之

意惟諸君子潤色之成使君一段光美 政施民
玩政猛民畏假樂君子憲憲令德卓異方騰內召
卽起畿內循良闕中名士不佞智巧不立岸異六
里容陽別開天地爰及朽人屬訂邑史指授大義
善自裁處表正風俗首崇節義貞女乞言幽魂欣
遂邑有前哲風韻猶存使君至止重光里門君之
去矣哀此愚民整貴多學先已得鄰甘棠永茂遐
邇不遺五尺之石百世之思

二十一日

人有疑孟子勉諸侯以王天下與孔子之言不同蓋

孔子之時諸侯皆周所封建周之典禮猶未泯滅
孟子時七雄非周所命者四而民彝壞亂極矣程
子曰王者天下之義主也民不以爲主則獨夫而
已矣君子救民於水火之中時爲之也

三十二日

一生苦樂惟人自取止爭看的破看不破少之時謀
望於進取得失分而憂樂形焉得者幾八其壯也
馳逐於功利貴賤別而榮辱招焉貴者幾人其老
也屬意於子孫賢不肖異而成敗係焉賢者幾人
看得破皆天定之數豈容一毫介意於其間此等

處既無介意則無時無處而不可領天地四時之
趣視世人之毀譽欣戚浮沉聚散爭如我山房白
雲之卷舒無定形來去無定方也古之達人高士
誰非吾師誰非吾友其無愧怍於心者自然辟盡
於面故學者須尋孔顏之樂無此樂終難語自得

二十三日

許典三問孟子以盡心知性爲知天存心養性爲事
天某今倒轉用之先以知天事天爲存養工夫何
如曰循序漸進聖賢垂訓立教不得不然到深造
自得之後則左右逢源感而遂通有何倒用博文

以約禮獨不可約禮以博文乎獲上以治民獨不可治民以獲上乎尊德性而道問學獨不可道問學而尊德性乎學者最怕有此執見

二十四日

學聖人只論工夫本體是天生成的一副完全家當萬物皆備無容言也情遷物誘之後本體喪失工夫所以復本體也反身強恕是復本體的工夫終身反身終身覺不誠終身強恕終身覺不恕用一分工夫復一分本體工夫只在本體上做性命是本體盡性至命是工夫明德至善是本體明明德

止至善是工夫

二十五日

氣運之升降風俗之醕漓謂爲一定之數不可挽回
則至誠之位天地贊化育善降祥而不善降殃者
種種皆聽於天地造物而已毫不得操其權則聖
人亦造物中之一人耳安所稱造命而至命哉謂
無一定之數則堯之水湯之旱豈燮理之無道耶
有定者有定之數也無定者無定之數也聖人總
任運以無心豈容一毫執見私意於其間嘗聞愚
夫愚婦有一念之誠亦足感動天地鬼神者此亦

有其數在焉余嘗過金提店士人爲余言郭巨埋
兒事歷歷然詩云人知其一莫知其佗莫知其他
者孟子傷其舉一而廢百孔子美其篤信而守死
行雖過而志可憫誠能動物不誠未有能動者也
意如斯

二十六日

死生有命富貴在天謂一毫不可移易者此世儒拘
泥之論非達人見道之言也孔子曰朝聞道夕死
可矣聞道之人命自我立豈制於修短之氣歟哉
孟子曰妖壽不貳修身以俟之所以立命也故李

言
鄭侯曰君相不宜言命甯直君相士君子不論窮
達獨善兼善皆不可以氣數自諉鹿江村嘗云有
志之丈夫不受制於造物知言哉

三十七日

憶前癸丑余與鹿伯順楊爾承同赴公車時伯順銳
意嚮學進取之意勃然余謂之曰人生何事最樂
伯順曰樂莫樂於好學爾承曰人皆以學爲苦而
子獨樂之何也伯順曰王汝止曰不學不樂不樂
不學愈學愈樂愈樂愈學此趣非深嗜之不知其
味爾承曰只發賣道統一事亦可笑矣得謂之學

人伯順曰發賣道統謂少涵養可也然自任之真
魄力之大豈尋常章句中人耶陽明摘甯藩不動
心不能不動心於王泰州講學能令樵夫聞道曰
離山十里柴在家裏離山一里柴在山裏此豈可
輕言泰州哉學問宜痛除將就冒認純一無偽以
義理用事一徇形跡或稱兵向闕以爲忠或理兒
割股以爲孝或伏節斬弟以爲法或觸槐曼面以
爲勇六言之所以六蔽也學之外別無可樂矣樂
學歌曰宜三復

二十八日

一部易經括於乾之一卦乾之一卦括於君子終日
乾乾夕惕若一爻其所爲終日乾乾者何也進德
修業欲及時也德之進也無跡可尋業之修也有
事可據忠信以進德立誠以修辭忠信與誠豈二
物哉進德修業豈兩事哉故曰吾道一以貫之天
地之道可一言而盡也一者誠也此可作居業說

二十九日

學問要有頭腦無頭腦從何處下手下手做到何處
終身莊蕩畢竟一無所成高忠憲曰學問起頭要
知性中間要復性了手要盡性只一性而已堯舜

湯文周孔諸大聖人滿不得此性之分量然其下手做工夫總之一敬而已故性以敬知性以敬復性以敬盡先儒每教人居敬窮理所以明此性也以友輔仁所以其明此性也得此把柄在手則日用間應事接人物飢食渴飲無時無處而非性之所流行散見也

三十日

朱子曰喜怒哀樂情也其未發則性也景逸先生曰情之發性之用也性之體不可見故見之於未發未發一語實聖門指示見性之訣靜坐觀未發氣

象又程門指示初學者攝情歸性之訣

六月

初一日

與李友郭書扇 老夫病起每與友人舉邵堯夫焚

香告天詩渾是吾夫子老安少懷心事近與友論

風俗舍孝翁更無可言孫婿友郭庚子辛丑間曾

攜其弟侄夏峯聞此言最悉者不煩老夫娓娓第

念子兄弟節孝之裔孝弟固屬天性而應事接物

時時當以此念推之紹聞衣德竊有厚望矣

初二日

學者須先有一段靜氣方可言入道有靜氣則不
聲色精神收斂心志亦漸清明動靜合一是就已
成言已成則無動靜之可分靜固靜動亦靜也兵
革百萬無異蔬水曲肱學未成則無端之擾攘滅
於東而生於西此須時時戒慎恐懼體認天理驅
除人欲方可收戰勝之功

初四日

久不雨苗將稿矣師旅饑饉一時俱見切念旱潦者
天時也溝洫者地利也引而導之者人力也督人
力盡地利停徵減稅以佐天時之不及者善政也

前輩穆文簡公有言江北之待天時不如江南之盡人力盡江南之人力不如修三代之善政今之修善政者蓋難乎其人矣

初六日

荀助陵訪陳太邱驚太史之占至今傳爲盛事文若道似伯夷陳羣曾著之滕上者家教謂何乃皆爲曹用文若至加九錫始悔晚矣羣之仗殺伏后亦太忍矣太邱乃有此等子孫耶三國人才之盛然識題目者獨有孔明一人宋儒猶謂其行不著習不察吾不知其所謂著之察之何物何事也題目

不得清楚下筆安得有好文字不識理而亂做者
此等文字正自不少

初十日

孔子之謂集大成春秋以前之公案惟孔子定之朱
子集諸儒之大成春秋以後之公案惟朱子能定
之朱子歿陽明拈朱子晚年定論而朱子之議論
始定則朱之後陽明之集大成可知也後之學者
尙曉曉何哉

十二日

客問學是如何事夫子一生時習不厭曰盡性以至

命盡人以合天總只一學字徹始徹終無內無外
對已曰自成對物曰兼成已在物上成成物方謂
之成已學在誨上學不厭自能不倦總只是一箇
心一件事堯舜之性性此也湯武之身身此也五
霸之假假此也賢知之過過此也愚不肖之不及
不及此也惟學能令過者不過不及者無不及而
假者歸於真此夫子時習之功所以爲萬世斯文
主盟也

十四日

子曰吾無行而不與二三子者要知夫子所以與二

三子者果是何物真是無行不與知所與則知所
取矣易曰財成天地之道輔相天地之宜以左右
民有一時一事而非財成輔相以左右其民者乎
財成輔相合而言之無有餘不足之分亦無天地
之分也財成正所以輔相輔相正所以左右斯民
中庸贊天地之化育其謂斯乎非孔子其誰與歸
十六日

孔子曰性相近也習相遠也又曰唯上智與下愚不
移此就其常理言之孟子必曰性善程子乃以自
恭自素專屬之人爲此亦各就其所見而極言之

以盡夫子之意非與夫子之旨相悖也予思曰天命之謂性性豈有不善者哉率性之謂道乃知不道者不率性者也修道之謂教則約人之情使合於性變化其氣質而歸於理耳一有執著便成三說矣

十七日

憶爲兒時 母夫人多年病嘔吐苦不知醫坐視其病困不能以身代余自二十二遭先君子喪亦應嘔吐多年兒輩苦之時與醫講說漸有所知年過六旬病始脫體切愧平生不能療母疾今幸借兒

以瘳已疾也醫以手足痿痺爲不仁程子謂仁者以天地萬物爲一體若不屬已自與已不相干如手足之不仁氣與氣已不相貫皆不屬已故狀仁之妙莫切於醫狀醫之妙莫切於仁

客有攜其子若孫來問名且請爲之說余曰蘇老泉之名其子賦輒充州之名其子曰深曰渾名其兄之子曰黈曰沈成之曰吾以四者爲名欲汝輩顧名而思義此正家尊之事何煩老夫客曰達人名士繫一方之觀望此言一出人便取信且後生小子亦知敬畏焉因憶諸兒輩命名命字皆出吾

友鹿江村意亦如斯

十八日

婁子靜云理學所包者廣感之爲氣節建之爲功業
發之爲文章蓋有功業氣節而理學未醕者未有
醕乎理學順之而功業不建逆之而氣節有失立
德而不能立言者分爲四科合爲一事三善皆備
王伯安其人也

十九日

夫子於怪力亂神則不語於利與命與仁則罕言於
詩書執禮則雅言一雅一罕一不語只此三字而

生平謂言訥言慎言不出其言全體之精神俱見
於此甚矣哉言之不可苟也一苟於言百行皆苟
夫子於衛必也正名乎於齊君君臣臣父父子子
而拒父

之勿問季氏遜昭公陽虎囚
桓子不直斥大夫陪臣而曰惟禮可以已亂蓋思
深哉而心苦矣老夫平生多言今過九十猶犯此
病錄此以誌吾過

二十日

告遠近同人視病者曰學問須明於困亨之義則無
往而不自得不明其義固固險阻達益隕越矣士

當困窮宜守吾貞往則非貞不貞不利何有元亨
困象曰貞無咎有言不信困而言人誰信之不往
不言而無所事凡民耳故屯之象曰君子以經綸
經綸之道若曰做秀才時便以天下爲己在曾子
不曰仁以爲己在不亦重乎在屯經綸之君子即
在困亨貞之大人明於困之數則不難處亨矣
子曰竊比於我老彭只此一言已攜老彭於千秋不
然千載下誰知有老彭者孔明隆中自比管樂人
曰謙志也蓋孔明知管樂而管樂亦非尋常管仲
一匡天下民到於今受其賜孔子已有定論殺事

不桀舉趙謀燕毅泣曰臣疇昔之事昭王猶今之事大王也若復得罪在他國終身不敢謀趙之奴隸況乎子孫誠足以動物義足以服人此其人何如哉而可輕視耶古人多有不可及處後學當錄其長不可輕摘其短嘗見賢知多犯此病故述以告我同人

二十一

答客明太祖較漢唐宋開闢之主猶盛人知其德此堯舜功過湯武而不知石敬瑭以燕雲十六州酬贄戎廷而中國之疆兵戰馬俱喪漢唐有和親之

恥宋有納幣之辱明幸際剛健之大人作於上一切可以有爲故其立國規模迥出漢唐宋之上皇陵御製碑文字字真誠天生聖人豈偶然哉

二十二日

清孫讀書之所曰借閒居夫世無賢愚老少各有事
事無閒人也爾年未三十事祖父敬兄長教子姪
大節攸關爾如借閒誰當忙者因請易之曰不然
字各有義求得其味豈泥於助余正苦人之能忙
而不能閒也人止此心耳終日接接時刻不甯非
心有主而事咸宜飲食寤寐美景良辰皆在昏夢

中處適非大有學力人烏能閒淵明云偶要閒靜
蓋亦爲忙所苦故愛此閒老夫九十外人欲閒而
不能敢望爾之能閒敢望爾之求閒乎述此志勉

二十八日

爲郭公望七十贈言 稿入集

二十九日

甚矣同心之難也易曰二人同心其利斷金諺云三
人同心黃土成金舜有臣五人而天下治五人同
心也書云三后協心同底於道三人同心也五人
三人又不可得故云一人知己足不恨嚶鳴之好

寅恭之雅誠快事哉朋友參商不足言而僚友傾
陷無代無之嘗見明嘉隆之際夏言排去張孚敬
而言豈勝於敬哉嚴嵩謀放夏言而嵩豈勝於言
哉濟艱大之事而成天下之功者內外同心小大
竭力猶恐不能勝任況於相擠相戕如簪家敵國
乎同人傳曰至公大同濟險阻亨艱危舍此別無
術矣

七月

初一日

復周計百書 稿入案

初三日

連日思慮不清夜卧不甯念楊敬仲不起意三字爲口訣以治之人心無無念時意不能不起但要清其旁雜之念妄念邪念可不起而浮游無闕切之念其來也人亦不自覺正於此驗學力淺深

初四日

余來蘇門僅見郭宗伯一家有譜國史家乘萬不可缺而俗多忽畧一日偶爲枚卜孝廉言之枚卜歸十日而成家譜一帙其勇於爲義如此嗣後不患無譜矣家家記述其祖父人人敘錄其子孫仁孝

同心古今一也

初五日

四民之業士農仍不失古意工商市井之心不可爲也顧我子孫先期爲士不得於士不妨爲農孝弟力田賄不士亦士也

初六日

或問五霸假之也孟子遂薄霸功以爲仲尼之徒無道桓文之事者正而不譎非夫子之言乎如其仁如其仁夫子何嘗不大其功曰說話各有對症戰國時不知尊王止知有霸故孟子只提仁義二字

以壓倒霸功霸功正是行仁義而不能由仁義行
故以一假字定其案霸者之民權虞如也亦未可
輕視謂霸有假則可謂全然是假則不可由仁義
行是德之純一無僞至誠無息處行仁義恐未免
猶有色取行違之意聞達之辨夫子於子張已言
之陽明云諸公在此講學恐只落得一箇義襲而
取此語極有理會莫輕易看過

初十日

讀古人書要知古人之言之旨原情核理審時度勢
先得我心之所同而因以得古今論世者之心之

所同毛會侯曰閤廿一史自正文外不敢旁及一字蓋以予雖不知古人猶不至大誣古人也嘗嘆李溫陵者流逞其私智黑白混淆彝倫倒置如猛獸奇鬼逼人不可迫視宋儒論斷諸語類板幅拘滯使人才智腐於胸中對之白日欲卧會侯亦解悟人非苟於立言者因錄此段以質公論會侯又謂孟雲浦善學姚江者也夫姚江以明理爲宗以躬行實踐爲要而人以異學目之蓋起於學姚江之學而過焉者也今人習紫陽諸書而僅爲帖括先賢者豈亦紫陽之過歟姚江之學不致再傳而

失其真雲浦有力焉

十八日

復耿逸菴書 稿入集

二十四日

卒伍爲將帥韋布依卿相者古人亦時有之然皆以
非常之才遇國家非常之變故不得不破格而用
之任要重之職釐煩劇之務非其人鮮能有濟如
平常之才而當非常之任國家之不幸亦伊人之
不幸也老夫拙於才不敢輕言天下事每以孝弟
力田望子孫庶不至於失已爲鄉黨自好之士足

矣

二十六日

或曰先生終身不入仕又不急望其子孫入仕而孫
曾童稚應有司之試何鼎鼎也曰使之知讀書明
義理不應試便以爲廢儒業作農家子弟而面目
語言日益俗鄙安望成人古者八歲入小學十五
入大學使其明

行於父子兄弟朋

友之間而推之以達於上下前後左右之際不入
仕所以安貧養志不讀書便自貶德喪心學不學
所關甚大應試自應試得不得無所容心爲儒爲

士如斯而已

八月

十三日

寄崔王階書 稿入集

十七日

跋李坦元手書 稿入集

十八日

復戴定園書 稿入集

二十八日

王師南征路出衛源有蒙古不訓者數十百人入

輝縣山中搜掠民間衣蓄一空二十九日十一騎
至夏峯入余兼山堂韻兒出其衣被捲之而去老
夫避之樓上鄉之婦女依樓而棲者二百餘人幸
皆無恙

三十日

郡廳縣諸公聞余有兵戒俱來慰

九月

初一日

共城諸紳士暨諸戚友邀余入共城入夜至李霖九
齋頭卽下榻其家冀渭公王枚卜王盞水諸同人

話夜

初二日

城中諸公聞余至俱來相勞 是日集渭公大隱園

初三日

池邊候之招與其太公夜話

初四日

學師袁泰微 孟濬生光祿各治具就余

壽春徐勝之尹芝仙暨門人姻戚各攜具集於李舍

初六日

返以終諸戚友復爲挽留病軀以不勝酬應暫歸有

小使自故園來容城縣志告成 聞姪孫永宜入

學

十五日

題靜修先生啟學後 稿入集

十六日

答唐青壇相公書 稿入集

二十九日

示諸孫 漢家舉孝廉然漢史固燼卻無孝子傳傳

孝友自晉史李密始東堂忽猖獗非本色乃知真

孝子固非等閒人也論語孝弟仁之本孟子堯舜

之於孝弟又曰仁義禮智樂之實總歸於事親從
兄堯舜唐虞之孝子也孔子春秋之孝子也孫文
正謂孝友之士宜在朝廷孝者所以事君也爲子
不孝斷未有爲臣而忠者訓人家子弟只教之以
孝弟則其造福於人也大矣老夫生平承良友提
攜勉之以爲真孝廉迄於今抱愧於心子其勉之

丁月

初一日

復劉心洲問學書 稿入集

初二日

寄魏蓮陸書 稿入集

初六日

一寒生才可以學平昔亦有嚮學之志只是不肯實
用功夫余詰其故曰未免爲貧所苦故不暇耳余
曰孔之樂在其中顏之不改其樂全是要治貧子
饑矣而舍梁肉寒矣而舍文繡是求饑寒也因古
二十八字志勉 寸寸光陰片片金光陰去矣學
不深曲肱陋巷人皆便只少浮雲富貴心

初八日

與王照載書 稿入集

初九日

與崔承一書 稿入集

十四日

贈孫獲甫二絕 忽漫別來廿二秋每思涸溢感前
遊飄蓬同作無家客我固蹣跚子白頭 論交
白鹿江村兩世金蘭共一門特地遠來無可獻
山長笑佐清尊

十八日

答陳子石問 稿存原冊

十九日

語何生 稿存原冊

二十五日

與耿保汝任含真曰二子此番爲十孫漢納采至
姻 只一論財遂壞風俗孔子

公治妻南容表二賢擇德 茅止生與余締

其婚書云江南錦綺之物斷不敢令纖毫入公
以點清德耳一時同人以爲知禮

十一月

初一日

占象屯先是三無與余同至蘇門以

爲居傳三無自其先世皆遠於易

余與居三月因得聞學易大旨繼而余卜居夏峯
三無復與余蓋同餐夜同榻嘗題余兼山堂云兩
山相兼土之藏水之潤風之散日之暄氣至化行
總は無聲無臭一背自止趾之動腓之隨身之安
輔之序事因時起依然何慮何思至是卒余輒以
聯亦有一日形銷高眠莫共兼山樹千秋業在講
易當讀聞嘯樓之句三無姓李氏諱鼎字霞表余
以其口無雌黃眉無煩惱心無機械因號爲三無
也素兒望兒皆其壻韻兒尙兒注孫淳孫昔從之

遊

十五

懷趙寬夫 久望吾丈有淦水之行可過兼山堂不

意其不能來也見手札知有鼓盆之變悽惻久之

吾丈何以堪此凡事到難堪之際須學力以勝之

來札云於此中默默磨勘悟出一恥字云讀之

再三愈覺淋漓痛切孔子云知恥近乎勇孟子云

恥之於人大矣此字見真是太阿在手千聖萬賢

所從入之途雖異而其歸則一總離此字不得保

汝適來亦

何喜如之新鄭君大有

州人也既得行取是吾道之行爲 良深衍義印
出當以兩部見示以應湯孔伯之求也

二十日

語遠近新舊同人曰同人共學最要除去忌諱之意
方能相長試看孔門氣象夫子見南子往公山子
路則不悅夫子欲正名子路則以爲迂夫子於子
路亦曰由之瑟奚爲於邱之門若由也不得其死
然此何嘗有一毫忌諱夫子又曰志意不立于路
侍此可見夫子爐錘雖嚴卻有一段相信之意在
此方是聖門朋友

二十一

飢餓窮愁困不倒聲色貨利浸不倒死生患難考不倒而人之能事畢矣余謂素位而行之君子上也
不淫不移不屈之六丈夫次也循理守分安命余
之所謂不倒也

二十二

孟子曰君子有三樂而王天下不與存焉此分明指
孔子說乃今思之孔廷俎豆輝煌萬古其堂曰明
倫其學曰不怨不尤與及門絃誦詩書疏水曲肱
浮雲富貴此段境地與王天下何闕漢唐宋三代

令主王天下雖不足霸而有餘分羹之語何忍言之太宗於父子兄弟之間又何如哉陳橋兵變恐亦不能無慚德也君子有三樂而王天下不與存焉然耶否耶

二十三日

邇來成我存談學專言耐字謂涉世立身須有得於耐之義方能有成要耐的貧耐的賤耐的屈辱耐的小人耐的橫逆舉史冊中唾面償金奪馬牽牛等事一一搜出以爲磨礪之助老夫每以此語同人共爲勸勉構斯推韓子新韻兒推震之各指其

事歷歷予爲之喜曰吾耄而病默自省察尙覺血
性猶在二子於此處裕然如此便是真實學問顏
子犯而不校必是曾子眼中曾見他不校非口頭
虛語也二子益矣

二十四日

天位於上地位於下人以一身藐焉中處而曰位天
地贊天地配天地不幾乎大而無當哉靜焉思之
唐虞三代之世堯舜禹湯文武參贊之力也春秋
以後迥乎不同矣而夫子之所以參贊者更遠且
大試觀今日非夫子之道人何以得安富尊榮何

以爲忠孝節義何以爲聖賢豪傑凡此皆夫子之道也今日之天地皆仲尼之乾坤也不獨仲尼凡遊聖人之門而登明倫之堂者無一人無參贊之責也無一事非參贊之事也人各有家父父子子兄弟弟夫夫婦婦是卽一家之位育也人各有身貌之恭言之從視之明聽之聰思之睿是卽一身之位育也吾心吾性卽天天豈遠乎哉存心養性所以事天事天卽贊天也事天豈難乎哉一日用飲食之事而已矣如必聖人而在天子之位方可言參贊是自棄其天者也

二十五日

江村先生云讀有字書要識無字理不識無字理逐處有碍朱陸遂成異同三仁何以合併禹稷顏回何以同道識得無字理則五經四書任從何處領會無不可直証源源本本蓋道一而已矣萬殊原於一本一本散爲萬殊天地萬物古往今來總是一家人總之這件事非有二也

十二月

初一日

盧禹鼎侍御於聞吳菴築草亭三楹顏曰就正爲題

一絕 每從花外望軒車多少高人此小居
惟道夏峯添爽氣因君新築一茅廬

初九日

郭孚伯雨仲張養重尙威如暢卜九劉雲木見過口
占貽之 未悉三千餘歲事已成九十一年人自
慙日月成虛度侵勞諸君來問津

十四日

張動子攜其弟靜子過兼山堂爲老夫稱九十一歲
之觴二子兩母同庚其一段怡怡友愛之意令人
悅而起敬老夫因謂之曰士希賢賢希聖只從此

一念怡怡做去便無不足願昆玉勉之

十五日

耿保汝有文爲余稱九十一歲之觴安邑馬振公兄
第其同社周世澤吳君炤薛良瑾楊震初郭續汾
楊念祖張宏憲王昊之王奎斗南初謙喬宏德景
之瑄劉日益陳所蘊謝鼎南二謙郭繩汾劉枋齡
張宿焜劉喬齡王一中馬蕙楊天爵等以景乾禎
之文介馬構斯爲余稱贊且致祝焉安邑理學倡
之者曹貞子先生呂見齋行其賦聲氣之通無遠
不至是夕同人大家鼓舞次日江陵漆繼伸介李

煉菴趙寬夫字稱贊併祝 憶昔讀書江村鹿太
公稱八十之觴遠邇親友暨門人雲集忠節爲金
衣公子二辭以侑觴太公偶自歌之今余年九十
有一五世一堂親朋滿座老夫愉快亦戲爲二辭
謾謂我耄年我胸中別有天饑餐困睡隨方便
也不學禪也不談元一編孔孟徹宵旦我耄年氣
求聲應一夕得多賢 莫謂我蹉跎既蹉跎沒奈
何一息尙存休再錯晉賢初和楚材又過朋來自
遠尼山樂我蹉跎朝聞夕可一著豈須多

十五日

客問子曰不憤不啓不悱不發聖人豈不能使之憤
悱必待人自憤悱然後啓之發之乎余曰夫子無
端爲此言其故何也正所以使之憤使之悱也魯
論二十篇顏曾有顏曾之啓發由求有由求之啓
發其曰飽食終日無所用心難矣哉又曰羣居終
日言不及義難矣哉那一人不在使之憤使之悱
之中不獨及門士即千百世而後兩廡諸賢以及
愚不肖那一人不在啓發之中那一時非使之憤
使之悱之處書有前一層後一層善讀書人要全
體領會鹿忠節有言讀有字書要識無字理方是

善讀書人

二十日

余讀唐史文皇開明雄畧平定天下遊刃有餘泊績亦多可觀此古今罕有之帝也惜身範未脩家教未著故宮闈骨肉之間多慙德焉按唐歷二十一君國祚三百爲子所逼奪者二爲婦所乘者三爲賊所逐者五爲妻所殺者一爲宦官所立者九爲所殺者三議者謂文皇兄弟不得其死且滅其十子武氏殺唐子孫殆盡豈偶然哉古人行一不義殺一不辜得天下不爲文皇未之思耳先儒謂漢

唐宋王不足而霸有餘五霸之命騷虞如也切莫
輕視

二十五口

史稱漢高豁達大度以匹夫而有天下亦可謂命世
之豪傑然分羹一語未免失言子房亦當分過間
萬不至就烹此言豈可令間之後世嘗思夷尹惠
行一不義殺一不辜而得天下皆不爲漢高竊處
海濱豈不鳬鳬乎大哉興舜禹比隆矣惜其不學
遂不顧慮至此功利念重倫常皆輕唐宋兩太宗
弟姪皆不得其死而絕不聞有悔恨之意人心何

乃至是眞生間之想不能不痛哭太息也

二十六日

從來儒者未有不論性氣者也言人人殊董子曰性有生之質專以氣言則不是程子曰性即理也專以理言亦不是性者理之寓於形氣者也性無善惡而氣有邪正正氣配理爲上智邪氣克理爲下愚者故不可移全歸之自暴自棄不惟非理并非氣豈下愚不移之旨哉善乎子思子天命之謂性天何嘗命人以不善率性之謂道乃知不道者非率性者也修道之謂教則 人之情便合

於性變化其氣質而歸於理耳信乎中庸爲聖人
傳授心法論性者準於此

二十七日

韻兒近昨留心看鑑余謂之曰先儒謂通鑑爲萬書
之國津要子靜云爲善不同同歸於治爲惡不同
同歸於亂通鑑之大旨也亦古今萬卷書之大旨
也擇其善者而從之其不善者而改之讀通鑑之
法也亦讀古今萬卷書之法也如讀而不能從不
能改與不讀何以異

二十八日

爲蘇門交友序 先正云元有三儒許平仲之興學

耶律晉卿之止殺劉靜修之不仕三人而已讀元

史姚文 之父兄兄弟實子聲趙江漢各

皆萃止蘇門蘇門一席地而一代人傑焉亦靈

矣哉夷考平仲諸公當年化民成俗蘇門迄今傳

述則學非口耳之學其爲躬行之學可知也學非

躬行說精說一有何裨蓋夫子一生學力專注之

躬行行庸德謹庸言躬愈行而愈覺其有未得也

平仲之學能化老僮歸俗此豈在口耳上做工夫

其平時與臣言忠與子言孝與弟言恭與友言信

其嘿 感動於人心者固自有在 云說得一文
不如行得一尺平仲諸公之學其躬可知已余來
蘇近三十年遠邇學人過訪莫不津津乎姚許之
人余謂遠在數百里外者不能常至百里之內可
朝發而夕至因聯爲社或月一會因姚許化民成
俗以求夫子之所劑至魯至道竊思凡過蘇門者
非我所敬事之人則其事我之人也我所敬事則
我之師友也 事我則我之子弟也樂莫樂於良
師友樂莫樂於佳子弟則我輩今日之聚晤庶有
光於姚許不爲山靈所笑

孫徵君日譜錄在卷之三十六

康熙十四年乙卯九十二歲

正月

後學

永年武汝清
武陽王 駱校訂

初一日

九世孫致世孫金

桂鍾十世孫

天地 祖先拜後畏寒不能會親友相知者就榻間
爲語

初二日

寄黃岡韋世兄 弟某於前庚子京兆鄉試以尙書
受知於吾韋夫子之門伊時弟某年甫十七黃口
無所知識承吾夫子既署語於闥牘復獎掖於面

命謂人生當於功名科第之外審擇何以力學而以立身恐少年趨向昧定諳切提誨感極涕零嗣後幾厥南宮伏處草莽耿耿一念貧且益堅雖蒙兩朝屢贊弓旌而烟霞痼疾未敢稍易初心自忖生平有負師恩未敢有違師訓自浮家河朔將三十年第且九十有二矣近於令親程公祖處得聞老世臺密受庭傳大光家學一發祥於喆允再輝映於孫枝天復錫有道以大年極天倫之盛事第病體蹢躅聞之不禁舞蹈七十七年之世譜宛在目前吾師未竟之志俾以賢子若孫若曾善繼而

善述之此更門牆老腐生之所心禱而手額也第
曩有小言數種路遠郵致爲艱俟異日請正第有
六子十三孫十三曾孫二元孫皆知耕讀仰邀蔭
樾率陳左右他日當有負劍辟咤修通家之誼者
或不忍拒之麾之也

初六日

余叙中州人物醉心劉湛露賀景瞻兩先生之忠節
而理學者也湛露之孫始昌嘗從余遊曾序其遺
集景瞻之孫振能曾爲祖乞立傳近觀其春秋歸
義真有獨見者湛露諱理順杞縣甲申殉國難諡

文烈景瞻諱仲軾獲嘉林居殉義里人私諡文貞
西華李皀和字寒石高才能文章以氣節自持中壬
午鄉薦嘗寓百泉甲申逆陽之變恥與李賊同姓
改爲理遠遁不知何終

初十日

滇南盧頌蓼明末時司訓中州貧不能歸寄棲於孟
莊無妻子一姪孫相依同人爲之授粟授衣歷年
倦年九十餘卒王蓼藏爲之具棺其姪孫治老諸
生亦七十餘矣衆資其費得歸里父子完聚焉

百泉之下流十餘里有裴園水清竹茂稻美魚肥余

二十餘年與同人常居停其間額其亭曰會心田
冰削華石題曰蘇門第一園主人爲裴茂才酌古
好客有塵外意

初八日

答耿逸菴 自念此身一日不填溝壑尙期策燈燭
之末光得與良友過相聞問共証斯道是亦報稱
穹蒼之一端獨是塵飛雲擾山中人不得片席安
枕亦運會所乘吾輩安能容心哉昨蒙古越孔道
七八十里蘇門一帶大肆殺掠夏峯敝衣敗絮雖
在不免較之鄰近村疇邈倖已多手教孟莊之說

可謂窺機之先甚似至愛與寬夫適菴正有字至
且述提誨諄切信友足孚矣至與寬夫辯論之言
更見近日實詣讀之不勝快慰寬夫所云收歛非
謹慎之謂須要求此心恬適使生機盎然勿墮枯
稿一路臺旨所謂體認天理而要之以主敬本體
上夫一了百當正與寬夫之意互相發明二君之
見所謂分之而無可分也僕謂此事各就所歷處
要自修自証到一層便覺一層非止境即朱子氣
強理弱之說亦是就人生氣質情識處猛一指點
要著人扶起本性好用工夫尊兄扶抑之言已見

其大矣

初九日

爲吏部候選知縣南湖郭公墓誌銘 余讀書京師

識宗伯蘇門先生在萬厯壬子越四十年避地其
城始交其嗣君公望

因令其二子迂熙遇熙從遊方愜得近素心脩
公已矣嗣君來請銘誼不容辭按狀公諱士棟字
公隆別號南湖世居新鄉安仁里洪武初有諱欽
者遷定國村三傳至都舉人官通判載循吏傳至
千之歲貢官典寶贈通判祀鄉賢千之生蒙吉歲

貢官同知誥贈禮部尚書蒙吉生流是爲公父孫
進士叅政以清直著母茹淑人生五子士桡士梓
士楷士標繼宗伯公嗣次即公公生頴異天性孝
友不瑣計細物小節而恢恢有志嗜好不同人議
論亦不傍人籬下宗伯公每以大器期之十六入
邑庠十八食廩餼學使曹履吉批其卷曰此十八
房華樣也從楚黃易義侯金沙張公亮兩君遊註
大易四書解乙亥舉行優公嘗隨叅政公任吳楚
豫章齊晉及秦愉容色無違禮至事諸兄一如事
叅政公庚辰攜家赴陝西任至咸陽聞叅政公變

悲痛仆地又慮母淑人驚潰不勝假他事送還隻
身西奔三千餘里兵荒亂離淚枯糲血悲感路人
比至西甯知叅政公爲叅戎兵丁凌人怒而笞之
倏忽告殞直指使王章按其故公蹙然曰先君執
掌王事積勞成病豈因一卒殞命哉直指深服公
孝且疏請卹得俞旨三越月抵家容色深墨
鵝骨如柴裏葬皆本文公家禮祭儀嚴肅十餘年
不稍替甲申國變後遂頽然自放不事家務壬辰
歲貢考授縣令癸巳母淑人病侍湯藥累月不解
帶甲午母沒寢苦枕塊不御內者三年服闋後猶

鬱鬱如無所歸三月十日爲公誕辰猶懸兩先人
像拜泣終夕越二十一日忽無病而逝公之生平
仁愛天植視諸猶子如子有姊孀居迎養於家奉
之周至河陽流民范得正以貧鬻妻公力阻售主
得全恤以衣食平生絕念私非分之得事必受
虧於人與人交肝膽相示然諾不輕尤以禮自持
邑中言禮者必於公取證焉夫士大夫得立朝行
道則爲帝臣王佐否則不過庭闈孝弟讀書樂善
而已公有志未展則於家庭日用間亦復無憾素
少許可兄弟相師友每就質於予書理詩自益

切入再訂四書解頗有心得所謂一息尙存一息
不廢學也公生萬厯庚戌閏三月十日卒順治丁
酉三月二十一日年僅四十八配蘇氏開封府教
授贈吏科給事中蘓時震女男四迓熙廩膳生先
聘浙江布政張縉彥女未娶卒娶昨城趙允碩女
連熙庠生娶戶部主事李不伐女迓熙增廣生娶
禮部員外郎劉源湛女繼白河縣鄧林尹女迓熙
聘進士李芳辰女女一適舉人裴平蔡男庠生酌
古孫女一連熙出將於本年十一月一日安兆孟
莊之阡祔祭政公之側子序次生平是可銘也銘

日殫心圖旨蘊志青細其維學之疆有懷明發禮樂隄防其爲行之方惟修乃耀惟闇有章雖於身之膏所遇信有後之必昌有阡鬱鬱孟莊之陽生既依止魂則徜徉嗚呼是爲君子之藏

初十日

余向有輯蘇門遺事十則未成帙今欲補入數則合而成紀事二卷

蘇門有嘯臺有邵窩自晉宋以來天下皆知之然二公之精於易天下未必知也堯夫大儒內聖外王之學爲君實諸公所敬事天下猶知其精於易公

和無妻子居土室跡其行事仙家者流然火有光而不用其光此一語終身用之不盡千萬人用之不盡千百世用之不盡中庸邈世不見知而不悔此語足盡之余晚年益服膺此語請以質之讀易君子

十人社 友朋相關楊晉菴謂兩炭相燃其燄自發各孤一處燄立熄矣夫子雖不愠於人不知而朋來自遠樂多賢友意可知已邇於同人常過我兼山堂者聯爲十人社陽武三趙錦帆盧禹鼎張含濬新鄉四劉一六郭公望任聯璧周顯成汲縣二

蘇案中李范林合之大隱而十炭愈多而光愈烈
不問可知或曰公和火有光而不用其光又何說
也曰不用其光乃所以善用其光稽康烏能知此
因題二十八字 四海由來通氣聲十人百里快
同盟餒長薪積光逾盛竊比公和善用明

十一日

爲三莊記

入蘇門紀事

三莊者夏峯孟莊裴園也

孟莊爲郭大叅孟諸公鄉墅去夏峯里許公隆令其
子廷熙遇熙從余遊以星聚堂爲同人講習會聚
之所高鑄馬爾楹耿極皆攜家寓此劉公融亦結

茅爲乞身移家之地雖未果有留琴堂在焉

十二日

爲蘇門書院紀 余移家共城嘗往來百泉書院蘇
門一片地爲古昔諸君子所徘徊臨眺稱地靈人
傑者始於晉大於宋而盛於元晉之有公和居士
窟嘯聲出林谷咎稽康數語見道甚明考其生平
亦高蹈之流耳宋之康節其來也受易於共城令
李公之才安樂窩蓋不爐不扇之地所稱內聖外
王之學者也至元則可謂德星聚矣耶律晉卿嘯
邵學來居於此若姚雪齋許魯齋趙仁甫竇肥鄉

諸公開有元一代之運網維世道羽翼聖教人皆
知尊而信之矣考百泉志中明成化間河南提學
使吳公伯通創百泉書院宏治間提學車公璽又
建思賢亭以祀孫邵姚許竇諸公獨不及仁甫舊
歷間邑令輩公良杞修百泉志并遺其姓名噫仁
甫之懿行表著竟泯滅而無傳者豈文獻之不足
耶抑尙論者之疎畧耶元史暨函史載江漢先生
趙仁甫復傳甚詳又魯齋年譜中載姚雪齋隱蘇
門傳伊洛之學於趙仁甫魯齋即詣蘇門訪求之
得伊川易傳晦菴論孟集註中庸大學章句或問

小學等書讀之深有默契遂手抄以還聚學者謂
之曰吾今始知問學之序矣按本傳載元兵南下
德安時姚文獻樞以行臺郎從軍得趙仁甫執手
定交攜與俱北是時洛閩學未行於中國仁甫乃
以記憶程朱諸經傳註錄出之以傳樞於蘇門山
建太極書院立周子祠以二程張楊游朱六子者
配食日夕禮焉刻諸經授學者求遺書至八千卷
請仁甫講授其中乃原羲農堯舜所謂繼天立極
孔子孟子所垂世立教周程張朱所發明演繹者
標其宗旨揭其條緒北人知有學則樞得復之力

也嗚呼江漢之學不獨有造於姚許而開北方之
草昧由是劉因郝經楊奐皆得其書而尊信之且
先生終其身不得榮以祿是先生潔一身之進退
者爲猶小而振一代之學術者則更大也今諸先
生雍雍濟濟皆得享俎豆於一堂而令先生滅沒
於寒石冷草九原可作不獨嘆其學之失朋而并
述源流之所自後學者豈可視前人之疎畧而任
其缺漏與有志於風教者其將有考於斯

十三日

紀王冲和 吾鄉王冲和老諸生也匿地之後流寓

於輝老而病病而死其子孫數口將爲溝中瘠借
孫紹開一言而衆爲購之死者得瘞生者得不死

十四日

孟雲浦集中輝縣鄉進士郭野號樸菴目已育獨心
慕尤西川先生一得小紀命其子讀而聽之而悅
之老夫來蘇門二十餘年百年內之賢者紳士父
老絕無一人言及之非雲浦集且不知有樸菴矣
當詢問其居住何處後嗣有無

十五日

大小戴世居魏郡斥邱斥邱口成安縣舊見成安志

云小戴之後憑字次仲僑寓汝南及輝縣家世禮
記尤習京氏易年十八舉明經拜郎中復拜侍中
京師語曰解經不窮戴侍中口當附僑寓志內

劉湛露 賀景瞻兩事 入紀事中

十六日

熊洛敘子伯遇夢飛同廣平朱乾度拱微安陽步伯
潛翔從學

是日江陵漆繼俾世昌同趙寬夫來學曰學問原是
全體太用一了百當之道學者只從事於此一事
更無不盡所謂一事者復性而已如樂正子何如

入孟子便從可欲之善直推到美大聖神地位此
可欲之善便是人之性善從來惟堯舜孔子方能
滿此善之量故孟子道性善言必稱堯舜又曰乃
所願則學孔子也只此一點性善終身學之不盡
豈非全體大用一了百當者乎

十七日

李寒石一段 入蘇門紀事

杭世拯博學能文章父母歿以貧老無所歸寄厝兩
河王蓼航資之得合葬夏峯

鹿忠節之孫洞觀卒於臨洛其孤寡依余而居郭公

望周給歷久不倦李霖九魏蓮陸爲之結廬蓮陸復託郝思皇爲之歸襚葬於夏峯

十八日

劉端毅公王宏治間爲輝邑令公廉仁恕諸廢咸舉禁喪葬無作佛事想當時亦有聞其風而興起者否

十九日

爲大宗伯郭公傳 公性端謹出語驚人爲諸生時李襄毅化龍稱爲中州第一秀才進士選廣吉士不妄交接門無雜賓同館中爲一焰人題壽詩額

云中興柱石公曰未嘗有廢何云中興竟不應授
編修李家宰載爲姻戚六年無一語爲人居間辛
丑爲會試同考官所取皆名流時有講學京師者
一給諫約偕往公曰此如老僧在人煙湊集處誦
經言是而意不誠也獨不往癸卯與江_陰試回同
鄉沈龍江鯉在政府公謁之沈留飲曰余在田間
久近事未諳幸時見教公曰公爲政所平章者皆
各曹之事虛心與各曹議自有確見如有疑於心
與同館公議同鄉私與雖公亦私也沈是其言楚
藩之事初卽置宗人於辟獄具而蕭司寇與其屬

侯閭屬爲公同年公曰草草殺高皇帝子孫後有
償之者兄及司寇也其屬追司寇於朝房而止其
事歷遷中允諭德庶子李襄毅公爲大司馬有將
領欲求遷秩者託琴士說公向司馬言公曰此賣
朝廷疆土所得子每痛恨之言何至於吾耳乎琴
士絕不與見王子復典順天鄉試事竣告歸家庭
居十年絕無一字遺長安初劉村諸將四路之敗
廷議主守已未庚申間遼警日急公憂時倍切時
弟浣官京師數遺書并語當事言可以戰庶可以
守諄切數千言甚中時弊辛酉憲宗御極起少詹

事掌南翰林院事疏辭不允尋陞禮部右侍郎時
勢孔棘未敢例辭王戊二月廣甯陷奮然具疏力
疾就道其畧云人謂山海真足以守臣謂我之兵
力足以勝敵敵而後得安不足以勝敵敵不
得安內帑有金錢四海有壯士而不奮然從事待
帑金費盡一絲一粒取之民間恐征求繁而邦本
竭矣疏上即攜家行時畿內人心風鶴途皆南
首公獨盡室北轅至中途感瀉痢至順成門外養
病未見朝而逝朝臣言公此行以身殉道之事惜
未究其志賜祭塋廕贈禮部尚書公性孝友恬靜

官京師守父贍澳公之訓嘗云行未嘗有近名之
事故敘列先世遺行不敢一語誣先人名其齋曰
適量爲窮通得喪莫不有量貧賤未嘗無樂富貴
未嘗無苦貴適其量而已甯陵呂公坤謂家庭素
所推服爲真儒有抑之者力申助孫文忠承宗督
師闕門公嘗有書勸其選時將恢復文忠多用公
議所著有菜竹園草若干卷 歲寒老人曰公爲
詞臣口不談學而躬多實修所交接皆一時名紳
余於王子曾識其人而心儀之又十年壬戌東事
方棘國事日非公與其弟澆深憂之日與當事鯁

饒爲招兵禦敵之策而當事者不能用因力疾上疏以痛哭流涕之言而抒其忠憤鬱結之氣此與孫文忠同一心事志未遂而身已殞惜哉

二十日

題餓夫墓 彭了凡名之燦蠡縣人甲申後棄諸生

妻子相繼死來依余蘇門性簡癖不與俗諧然嗜山水人有欲授之餐者以食嗟來爲恥曾登九山絕粒數日余挽之如下後竟生死嘯臺墓嘯臺之東隅余題曰餓夫墓爲文以誌之同人贈詩

二十一日

余來蘇門以李國華爲居停國華長厚而涇渭分明
與人交久而能敬卽有橫逆之加能忍人之所不
能忍族黨姻親子弟有失所者多依之其從姪瑤
舍名擬有古俠士風國華甚重之時爲余道其人
與事

保定魏蓮陸久從遊廿年解官每視予夏峯輒不忍
去結茅於兼山堂東偏額曰雪亭

二十二日

爲趙江漢傳 入紀事中

二十三日

蔣虎臣庚戌冬過夏峯爲其尊人中完公文集求序
又爲其大父求誌墓辛亥春復來懇余樂是居者
久之自謂某住此雖無多時卻是兩年

二十四日

客有慕蘇門山水源泉之幽僻思築茅於此一爲避
地一爲談學請余手書宗旨數語以當書紳余嘉
其意與之曰道之大原出於天中庸天命之謂性
也只一性字天地萬物古今宇宙一齊貫徹率而
行之則謂之道由仁義行非行仁義一毫有意於
其間則非率矣一部中庸皆修道而教之事言天

道也爲人道榜樣總爲盡人以合天生安不廢學
孔子生民未有之聖曰若聖與仁則吾豈敢抑爲
之不厭誨人不倦自信爲好古敏求曰學而時習
之其所習者何事無處無時非盡性之功也一盡
性而天德王道無餘蘊矣千聖萬賢其學皆爲復
性非學則可欲之善無由而見何以能有諸已而
馴至於美大聖神之域耶人之所以異於禽獸者
幾希全借學之一事以君子之存而留小人之去
此聖學之所闢於天下萬世者厥功大矣哉

二十五日

爲大叅公郭公傳 公定議不倚黨而有爲兄倡爲
宗伯公成進士初爲行人有謫其兄者因兄公遂
量轉戶部主事會有權闕差利可數萬計公力辭
曰象焚在賄吾不欲以此賈也遷荊州府知
府州縣糧上易其牒原封不啟火以息諸生剽
悍監司抗鱗聚數千歃血煽亂縣令畏懦公遣
健丁往勾之衆皆散檻十人以坐其率自是諸生
遂不敢逞歲大稔公爲酌其重輕停徵勞徠以救
民急安賊聞天子方事詠伐督師檄土司兵公曰
土司今皆餒民耳安得兵乎募卒人三千荆人三

千諭將領之安賊遂不能爲害尋陞津門兵備問
民之疾苦而津兵兩營久疲頓歲支金按數以給
公爲條畫班次休息訓練部伍肅然是時魏璫心
腹以覺華島督將託公公曰實中冗葺安用此輩
璫排耶此島與夷隔一水甯得罪巨璫不敢悞封
疆事璫又託兵部爲某求旗鼓公持益堅璫遂嗾
陸御史彈公乃補揚州守吏以公費銀餌公笑
卻之未幾遷南昌守鈐強宗勘通賊加意練兵繕
營易米鹽械器各屬邑得兵一千三百自備無不
鞏而身寇至豫章謚如摧山西糧道及至諸寇嚙

太原公持議合剿賊其要害總戎某懼賊如虎
軍不估閑而縱之掠民公爭之以是憾公賄監臣
某毀公於捷疏中尋以系謫歸閬而太常卿張鏡
沅薦公河當重任補鞏昌公至多儲火礮烏鎗濟
壕築城以開荒剛罷其催科時兩省發後委至次
金二千臺使者來問義公以之抵逋賊也播莊浪
兵備副使在年黑尙仁嘆夷以利諸熟番亦濟濟
客商不行環千里爲墟公振旅出莽遇西番覲我
兵整不敢偏時松山將士鹿君至旌旆煌耀遂避
去兵糧壞商克復削身無完衣公恥爲侵牟諸

番皆曰親我國有爭辨爲亭平之資番之力以禦
賊頗得其助而邊事亦不囂囂又爲賑恤屯田
民買牛種以軍護民耕訟無賄銀五涼惟莊嚴公
在莊二載練甲積穀爲西北一隅雄選涼州叅政
涼去莊三百里故多強番公曉諭過所出沒公
齒頰爲三尺而能絕長久害以勞成疾卒於官陝
西巡按王章具疏陳宦蹟得恤公謹言訥訥進退
有度厯官廉約常取給於家臨終無長物云所著
有宦草暨家藏集若干卷 歲寒老人曰公厯官
絕無染指常取私家之積以爲在官之費雖其家

素厚亦其清操節守之已定故不見可欲而遷
公家世前未有顯秩然多實德祖孫父子兄弟列
鄉賢祠者五人可謂能世其德矣

尹芝仙名煜尹彥明後裔也以中書撫琴中先帝意
每到得意時先帝擊節曰仙乎仙乎因號芝仙今
流寓蘇門官紳以先帝舊人多禮敬之與邑令君
父周春雨封君友善二君嘗並轡過余兼山堂爲
竟日談春雨名尙禮喜作詩余嘗評其詩其人恭
謹無論少長一於謙冲絕不欲人知爲邑令君父
也家於都門

耿之基定興人弱冠中武舉其父權以諸生投筆爲
武弁押江西漕運釐革積弊致爲運丁所誣係獄
八年之基汲水以活其父事得白余爲立孝子傳
語遠近新舊同人二則 學問原是全體大用一了
百當之道學者只從事於此一事更無不盡所謂
一事者復性而已如樂正子何如人孟子便從可
欲之善直推到美大聖神地位此可欲之善便是
人之性善從來惟堯舜孔子方能滿此善之量故
孟子道性善言必稱堯舜又曰乃所願則學孔子
也只此一點性善終身學之不盡豈非全體大用

一了百當者乎 可欲之善知愚皆具有諸已之
信非賢人不能美大則須顏曾思孟並贊於禹曰
帝德廣運乃聖乃神宰我子貢有若之贊孔子曰
賢於堯舜生民未有若聖神則須是堯舜孔子

二十六日

田友蘭書來云先生讀易大旨成而羲文周孔之道
傳尚書近指成而堯舜禹湯文武之道傳四書近
指成而孔孟之道傳理學宗傳成而後世諸儒之
道亦無不傳余曰道之傳也不借於此久矣日月
之經天江河之行地吾友邇來讀書有長進故作

此解若會得源頭時經書中任從何句下手無不可理會全體夫子所謂一貫也因書以貽之

新鄉任節婦蘇氏贈以詩云衰殘歷閱九十一生平

最愛節義風撐天柱地三綱立巾幗冠裳功用同

廿年避地蘇山裏柏舟喜汎百泉水南望鄆城爲

比鄰釣竿時遇任公子任子家世稱巨望母氏黃

門蘇公女貞淑性諸織錦詞蘋蘩夙嫺盛筐笥夫

子地下促脩文子歸二載泣鸞分堂上祖姑暨舅

氏勸慮未亡惜寒雲身雖未亡心早亡跼白祖姑

寬舅腸未歸喪姑幼喪母天分伶仃徒悲傷生難

死易已分曉遺孤在抱切傍徨荻灰甘依斷杼冷
熊丸甯讓秋月光祖姑何慰衰顏解舅氏積疴身
漸康彼蒼有意憐節孝孤纔幼齡蔚文豹一出冠
軍橫秋鶚人道毋儀秉父教次丁祖姑舅氏艱率
子讀禮增湘斑荏苒冰霜廿餘歲承歡繼姑無違
顏泉臺不負倫常足貴而能忘崇簡素全節完名
闕化遠國史他年應相附 衛郡蘇黃門環中公
有女適新鄉任孝廉光靈公公恩選玠甫二載卽
稱未亡人年僅廿齡耳明大義賦幽閒貞靜之德
事尊長孝而有禮撫孤幼慈不廢嚴教子昌九弱

冠登賢書通國皆頌其節迄今二十餘年矣聖天子表閭之書雖尙有待賢使君旌廬之典豈容或稽綱常所係風教攸關不揣衰耄偕附一言以爲同人之倡秉彝之好人有同心耳

余嘗以劉靜修望劉一六郭林宗期郭公望二君今日之行徑已具有兩賢之體段蓋欲其擴而充之光輝發越進一步有一步之得力勿令人謂樂正子齊修於二之中四之下也因爲句云靜修一六之前度公望林宗之後身一念發皇無止足好從芳躅見重新

二十七日

劉一六甫拜除書未抵任即圖解官謀於余余曰出處當自決莫貽後悔一六曰予意決矣余曰意既決一辭再辭無不得請之理元有劉靜修之不仕今又有一六劉禹錫云前度劉郎今又來一六則更於靜修有光矣

郭公望余初抵蘇門即與之論交嘗以郭林宗擬之今且三十年矣久益令人服今兩家子孫爲朱陳之好初張大隱謂余曰公望六行之士久爲月旦所推戴司農手書六行之士四字爲額以贈之

二十八日

耿逸菴錄其與趙寬夫問答書來質寬夫書云要希
聖只是收斂收斂非謹慎之謂去其所本無全其
所本有而已逸菴書云吾聞之師曰學問之著落
在日用倫常能於此中見得觸處皆天命流行便
是透得大原本所在我輩果有戒懼工夫久則氣
質自然變化因循意日用間體認天理而要之以
主敬時時小心翼翼而後觸處皆天命流行也
宋之儒小傳 宋與贈天演之派曾舉孝廉未仕類
來問學余題其讀書之室曰用易齋

二十九日

馬玉筍衛河圖說 應入蘇門記事

張于度小傳 應入蘇門記事

二月

初一日

諸同人問人生何事最樂曰逢良友最樂又問其次
曰讀書最樂讀未見書若逢良友讀已見書若逢
故人凡開卷無非樂處矣同人曰世無不讀書之
人而鮮有能樂者何也曰讀書不在誦其言而在
識其字如讀孝字弟字而爲人不孝不弟便謂之

不識字何樂之有即就孝爲百行之原所包甚廣
先聖言事君交友戰陣等事有一毫不盡分便是
於孝有虧欠夫子言堯舜盡於孝第孟子言孝第
可以王天下聖學舍此無以明王道舍此無以治
昔日姚許在此化民成俗豈能於孝第外別有高
妙我輩今日共處斯地皆有倡率之責不可輕視
此身同流合汚信得及自不容分知行爲兩事日
用間無往非倫常之境遇無人非同道之應求何
樂更可以逾此

題拳拳錄

余幼讀理學書程朱之外絕不著意鹿

伯順得子靜陽明集反覆玩味曰吾固意當有此
也暨觀朱陸同異陽明少靜論於紫陽曰吾亦知
應有此也孔子何以與墨子並稱孟子何以與荀
子並稱初並稱未見其不是論必久而後寤耳朱
陸同異陽明靜論至今訟不息殆有甚焉然有識
者已蚤見其一本萬殊與不殊一本之義矣讀梅
村拳拳集與江村吾友識力見地若出一人至謂
象山陽明之非禪而兩人尊信之真亦若出一人
余讀拳拳集見梅村遂若見江村敬附數言同人
讀拳拳錄有疑其語近禪者曰生無其生死無其

死夫子說未知生焉知死又曰朝聞道夕死可矣如何曰無生死曰要得其立言之旨曰生無其生謂幼而不遜第長而無述焉老而不死與無生何異死無其死謂充實之美即殺身成仁舍生取義其光輝發越與天無極此何嘗死又外篇序教有三也性一而已教者淑世之旨性則生人大凡也夫聖學本天禪學本心其介甚嚴豈容混而爲一曰三教之旨法各爲用彼此不相借彼此不相侵持以出世各尊歸行知行所無事其何傷於天地之大與日月之明哉請與著述之人面商

之以見我輩共學之意

初三日

申耀陽傳 河朔有六行之士申君耀陽者名紹芳
字繩武世爲延津人祖東塘公諱志深萬厯初歲
進士以苦學名里閭坐臥一室厯四十年牀繩
几木當手足處痕深寸許所著有時習語錄延人
士以鄉賢祀孔子廟庭父奏廷公如塢舉萬厯乙
酉鄉試官九江府通判能繼父學有望邁詩一卷
學者稱之耀陽生而穎異敦孝友事奏廷公色養
備至大母耄老遂閉戶奉菽水歡考終時年九十

奏廷公衰矣禮不爲喪君爲陳祭治墓經營祠墓
皆有成績實承父志焉奏廷公樂施與故人婚喪
每厚爲周恤君必善體之豐腴有加迄居奏廷公
喪三日不粒食蔬糲居於外者三年每伏臘薦享
盡誠盡哀祀事必備未嘗累兄若弟至族之兒孤
婦寡皆撫恤如親弟子復聯同族會族共飲食而
齊好惡修葺祖塋不役支庶遵范文正遺意自捐
百金置腴田八十四畝於墳墓之側以爲祭田豐
則治俎豆儉則備周恤台申之老稚嘗有待以舉
火者丙寅值歲凶出粟百石以濟飢者好施棺殮

滑不可枚舉邑之大使驛丞皆賴以殞殮聞者義
之君重節義一日過此山縣烈女墓式而感焉往
拜其家已零爲衰草君具陳其邑令尹重表識之
始去君翁繼芳蚤世婦李氏矢志節操者四十年
君俾成其節爲白有司詔旌其閭表章前輩文獻
如文峯所著嘉言重鋟以傳君生平喜讀書坐臥
其下口不絕吟手不絕披歷少壯陵谷兵戈水火
弗衰所著有資治說約十數卷于宣國刻行於世
君歿後合族追其隱行泐之碑載生平甚詳僅磨
乙酉援貢自司訓於祥符惜未究其才云 夏峯

老人曰余移家蘇門去延津僅百里嘗聞其鄉人
士言申氏父子祖孫殖行力學之狀心切嚮慕之
一日申茂才宣國至夏峯持耀陽公所著資治說
約求敘君同友千古心血傾注余惜君之才未遇於
當時而喜君之學尤可見於後世篝燈詮次其生
平不禁老懷傾倒也

初四日

重建烈女祠碑記 大梁之西郭舊有六烈女祠李
公空同爲文記其顯末蓋天順正德間事也崇禎
末年大梁沒於水祠與碑皆爲地中泥後三十年

土人掘地得之。歸於僧。值剝磨其字。盧龍韓子昂
業見而傷之。告於余。因聞於里之太史王君夢航。
贖以金。樹於信陵君祠右。夢航復爲詩紀其事。又
二年。上谷魏子一鰲過信陵祠。見烈女碑。謂風化
所闕。擬別爲祠。時有王烈女未嫁。殉夫事。言於學
使史君雲次。將配六烈女。而七以候旌。未果。又一
年。余季兒博雅復言於河使崔君惕菴。慨相地於
上方寺東隅。與信陵祠并。時會使臬金陵。將行。屬
方伯金君治公始爲落成。七烈女靈爽相聚於一
堂。風教頓興於千古。衰朽喜諸君樂善之有同心。

方伯公見義之能獨力韓子乞一言勒之石余謂
陳烈女未結褵而剪髮殉夫至五十三年始遂初
志張爲婦一載高甫三月年俱十九耳能矢志相
從百折不易劉氏引梁上於一縲王媿繫樹間之
三尺至張婦痛夫田銳孝行之寃獨反覆以伸大
義終亦以自縊死六烈女畢命雖有後先而從一
則無二致其爲維綱紐麗照臨空同之文言之詳
矣獨是運會遷流人心剝蝕而聞風興起一念本
於性生故在上之人倡之則爲風在下之人效之
則爲化家得之則風化在一家官表之則風化在

一國天子旌之則風化在天下史乘書之則風化
在千古可見人性皆善觸無不覺叩無不應所謂
王化起於閭門貞烈存於巾幗大梁一席地爲兩
河表率之區女之貞淑如此士風民俗不更可見
耶即如空同子之文既沒而復出閱世二百年沈
埋三十載精光所寄鬼神尙爲之護惜今當崇重
節義之時復有王烈女殉夫之事烈女父王碧字
同邑于天祥將嫁而天祥病逝女誓不他適先是
天祥幼養於王姓娶婦生于烈女取而養之有程
嬰保孤之志已逾一年王姓竟奪之去烈女遂投

纒死是夜有星光墜其家亦異矣哉至誠所感召
前後同軌以愚夫愚婦之知能可爲參贊位育之
極至總不外性分之所固有謂非熙朝景運攸隆
與在上之風教暨風俗之醇篤何以臻此耶表書
不文聊誌梗槩祠成於甲寅秋九月冬十二日爲
之記

復題拳拳錄 余幼讀程朱書寢食其中不復知其
他迄余友鹿伯順得子靜陽明集反覆流連曰吾
固意當有此也復觀朱陸同異姚江效誨論於建
安曰吾亦知應有知也天下事理一而分殊殊途

而同歸易曰仁者見之謂之仁知者見之謂之知
余嘗思之人性皆受於天天卽昇以森然之理所
謂性皆善也然不無高明沉潛之異故爲之剛克
柔克焉學問之功所以輔天而復性也後之學者
不知天之所以爲天而遂狹其性之量不是彼而
非此則遺本而急末至較量字句之間何啻千里
之差耶嗚呼學問之道益難言之矣梅村李子佐
郡之暇涵泳於斯道日深有拳拳錄一帙不泥成
說不執已見與吾友識力見地若出一人要皆本
諸天而生余讀而麗然曰若公者可謂善言學矣

程子云不學便老而衰余衰老日甚借公以勵
光敬附數語以當面質

初五日

同人問姚江之學深切著明無復可疑然其身分造
詣所謂二之中四之下者當在何等曰姚江之學
可謂充實而有光輝矣姚江豪傑之才適任之志
當其昌言於逆瑾熒敗之時撻之朝而不悔意氣
激烈文章節義迥出一時及其擯斥流離於萬里
絕域形影孑立而且疾病之與居瘴癘之與親情
迫於中勢限於外蓋吾之身已非吾有而何有於

吾身之外至於是而後知平日所挾以自快者不
惟不可以常恃而實足以憎吾之機械盜吾之聰
明與吾獨存而未始加損者則固有之良知也然
則姚江之學出之而愈長時之而愈光鼓舞天下
之人至於今而不怠姚江之時念菴接踵而起念
菴真姚江知己姚江功人

初六日

與李梅村 昨見論學者雖黃姚江初亦甚怪繼而
思之亦不足怪也羅文恭之言曰正學之明獨在
孔孟之時而其後莫盛於朱然夫子方且責原壤

惡鄉愿而病異端楊墨之弊孟子自謂謂不得已
二程朱陸之於佛往往若敵墨之吾侵而及其身
不免於僞學之禁又何怪乎今日之黜黃姚江也
哉有欲與老公祖者俟面時商之郭生駿臣一字
并致詳在彼字中第故不再贅也

又言雖黃姚江之人向來與相
鄉共講學之人也今怕鄉絕非前日之見拳拳錄
序亦可謂老公祖知己

初七日

宋與贈孝廉問行不著習不察如何是著察曰吳草

廬謂諸葛孔明爲行不著習不察之人余謂孔明
舍孫曹而事昭烈著草著於此察莫察於此草廬
以宋孝廉而事元恐亦不免爲不著不察

初十日

復戴定園 霖老來悉道況清嘉殊慰懸結翰教遠
註恍如被襟促膝於滄海之間也今老夫九十有
二念吾友亦六十有八千里相隔覲面維艱耿耿
寸心兩地可信者惟此共學一事是非毀譽勘之
已明疾病死生守之頗固返顧生平雖所見有時
而遷而獨知之地不敢自欺識

理二字衡準

經緯原是千聖真血脈非語言文字本當故說箇
心卽在事止見說箇已卽在人上見說高遠在卑
邇上見說上達在下學上見戰兢惕勵不敢將就
冒認者只是慎獨而已數十年來奉教於師友者
以此印證於同學者亦以此卽如此老力駁姚江
之言本勝氣所鼓煽並不會識認建安面目亦
奚足怪我輩可因之而益勵燈光耳草率作報率
知已教之

十一日

重修太室山法王寺記 太室之中有所謂大法王

寺者由來舊矣自兵燹頻仍梵剎佛宇雜之荆榛
瓦礫釋氏適菴自江右經過駐錫於此覆土誅茅
蕭然自適嘗過余夏峯叩其所學蓋釋其服而儒
其心者也心竊訝之辛亥冬金壇蔣虎臣太史竣
畿輔督學事迂道過我將渡黃河問二室之勝訪
適菴於法王寺與之語連日夜傾倒之移晷於中
州學使史君雲次暨兩河藩臬諸使者共醵金數
百俾飭其舊剎與居靜接衆之所規制宏壯亦云
備矣工既訖適菴走字乞余一言以勒之石余迂
且老素守先儒之訓於佛氏之學未有所窺焉可

以爲此言因憶高陽孫文正言與一宰官暨一老
衲遊西山坐中老衲講中庸宰官講楞嚴意興勃
勃不自已兩人問文正何無一言文正曰適見一
異事秀才忽變爲僧僧忽變爲秀才兩人大笑而
去虎臣究心內典所至與方外爲緣而其行徑儼
然一苦行老頭陀毫無沾滯於去來之故真所謂
秀才而老禪者適菴制心和平皈依儒業所至與
臣言忠與子言孝實致力於日用倫常問其友嘗
舉許文正能令老僧野儒適菴默然笑其非知我
者余知其意有在矣余嘗與友人言法各爲用至

學術之辨毫釐千里不敢稍有馳越以聞後人擬議之端獨是入世出世之界天地生生之心分焉生生者太極也物物各具一太極萬物共分一太極人日由其中而不自知聖人見其道於太極流行之際佛氏見其道於太極寂靜之中流行之際理歸於有而實寂靜之中理源於無而虛有無虛實之際此所謂毫釐之辨也適菴能從無而見其有從虛而見其實此老夫之所望者至修建始末學使史君已有貞珉紀之不再贅將虎臣公諱超丁亥進士官翰林院修撰者理順天學政自太室

遊峨嵋山而卒史公諱逸裴乙未進士官河南通
省學政僉事適菴釋名宏庸落成於康熙癸丑之

十二日

漸學文 無窮身世有用精神日圓晏安積成暴棄
時爲警省漸入精微古人吃飯著衣便是盡性至
命吾人談天論地總非行已立身日用之功惟靜
心可入學問之道非勝氣能參讀有字書要省無
字理學而時習習何事與逝者如斯斯何物也天
地之大猶有憾夫婦之愚可造端三月不違愈見

不足日月之至儘有可觀富貴利達人一轉念即
豪傑矩行法言士聊生足滅凡民賦性原同因習
而遂降才雖異情發豈殊夜氣猶存當默省枯亡
我者何事雞鳴而起急追尋舜跖分者何途但克
放心要在責志功有深淺理無精粗誦詩讀書與
業不妨德業學詩學禮獨聞亦是共聞父兄師友
之間反躬無愧起居飲食之際樂趣何窮仰望同
人告教小子

題壁 人生最繫戀者過去最冀望者未來最悠忽
者見在夫過去已成逝水無容繫也未來茫如

風無可冀也獨此見在之頃或窮或通行時止
自有當然之事應盡之心乃悠悠忽忽姑待之異
日發責於他人歲月虛擲壯懷空老良可浩嘆

蘇門遺事序 入夏峯集

遺事凡例三則 入夏峯集

十二日

修脯置安樂窩議 蘇門山水甲天下固不借靈於
公和一臺堯夫一窩也然蘇山蘇水不知閱幾千
百年甯有幾公和幾堯夫哉公和當晉季無妻子
史氏稱之曰好讀書撫一絃琴性無恙怒與稽康

數言深得大易之旨夫豈不言也哉其默足容三
公和方稱足色耳堯夫讀書百泉之上志堅意苦
夏不扇冬不爐夜不就席者數年窩名安樂蓋中
心安焉而後樂心不安則不得樂也夫安豈易言
哉一念之私一事之僞更有惡於志而疚於心者
堯夫之樂固即孔顏之樂與此二子者所稱千古
士也予嘗薦蘋藻思紹異代之知俛首思之公和
不言而我多言堯夫窺先天之秘而我識閤若此
者二子之所棄也然二子雖予棄而我之皈依二
子當益切故對遺像若親承教旨焉今臺與窩創

建既久日見傾圯一傾圯而蘇山蘇水未免黯焉
無色甯止愚昧無所仰承如思親亭聚遠亭皆在
百泉之上載在縣志甚明今過求其跡多湮沒埋
滅不可考詢之士著皆茫然莫知其始嗟乎風雨
所侵愈久愈圯而復之愈難則臺與窩之終爲二
亭也且有其勢夫土木瓦礫之墟歷數百年於今
有顯則有晦有創則有壞至壞矣然後待維且挽
之者而後興豈不以其人歟王按君亮教新學宮
輝士永賴新晉宋兩處士之基費十之一二耳德
且與蘇山蘇水並風教之存敢望諸大夫之識治

體者

十三日

步涉橋記畧 其城之南有村曰西夏峯爲輝新孔

道每夏秋山水暴發溝澗水集架木爲橋行人窮
之順治己亥本村茂才郭守一糾附近好義者易
木爲石鳩工庀材不期月而橋成借余言以記顯
末余謂之曰今之世好新務奇以驚惑愚人之耳
目或淫祠或梵剎動費千萬金第鄉下邑罄囊奔
赴甚至儼然士林號稱知禮者皆附會恐後偶有
一二以稍異則闕然譏議不以爲病狂喪心則嗤

爲迂濶不達時務此正道壅塞而不知其爲非也
今欲正人心厚風俗不必遠求就目前方便以往
枉輿梁濟行人以濬渠築隄防水患老幼咸胥
輸資爭先助力不惜費不憚勞即此便是厚風俗
維人心之大端繼此而鄉井可復之義愚夫婦共
具之知能一人倡之衆人和之相倣成風習焉若
性難謂晚近非三代乎哉今始知考工一書無往
非闢人心風俗之意於此修橋之舉鼓舞恐後則
凡爲正言行正事皆如此橋可幾也橋成於閏三
月十三日

此係順治十七年作誤入於此

十四

蘇門山 蘇門之山等一拳草木不生色黢然何爲
博得古今傳幽事由來在百泉百泉奇絕自生妍
山不在高靈在仙更有名人踵後先靈脈原自素
山延千里相望幾盤旋應有高人得其全

咏嘯臺 長嘯山頭事最奇清譚叢裏別開基遺康
數語深於易喜怒不形亦我師

咏餓夫墓 嘯臺一餓夫素守清整志同人誦孤詣
行道訖且喟一客向予言擬人失其類欲追採薇
人情事已迴異之子無死法千古何所置予謂人

盡生誰解生之事人亦莫不死誰識死之義生也
淡視生塵好無一嗜所惡甚於死故不爲死悻悻
隱與差惡兩途迴環積苟食即苟生瀕死復手示
蘇門來依子故園竟絕意怪癖未足多深操良非
易客子聞予言爲下數行淚拭淚復沾衣濕染空
山翠

遊百泉諸大夫廢園 遲我來遊三十年園林臺榭
半頽然靈泉珠吐仍依舊假者難真真者全

誠詮孫道示在家在外請子若孫 陶公最曠達倦
懷在五子迂叟蘇陽八此懷倍難已責子更責孫

但恐荒謬史非欲騁詞翰時書養其恥物誘幸未
深立身從伊始毋輕圓舌鋒謹慎所自起勿輕陷
機心害還中於已留得一分模循得一分理祖以
欣光榮親知推嘉美爾曹各思之我心已千里

十五日

懷慶三子來從遊各求二字以爲命名之意余字之
以盟雲盟石盟嶽或曰嶽與石可盟也雲無定在
何以盟曰雲故無體自無出有而變化形雨澤降
故言天下之至變者莫如雲而底萬物者亦莫如
雲曰卿雲曰慶雲承日光景煜有目之所其見顧

不可與盟乎況乎從古英雄豪傑皆以風雲之會
雲龍之合而聲施不朽而顧不可與盟乎甚矣人
之狂所見而忽所不見蓋可見者有盡而不可見
者無盡也知無盡之義者可與言學矣

十六日

題三廬詩有別余來蘇門近三十年矣魏連陸築室
於兼山堂東側題曰雪亭廬焉鼎彝鉢茅於闥異菴
之左題曰就正軒劉公敞築茅於孟城題曰留琴
堂三君子或頻年頻來或數月一來或數年一來
總之眷戀表殘喘歸之意因題一絕寄我停雲

夏琴僵臥廿餘霜三千何來笑舍傍就正留琴與
立雪後人指點更風光

十七日

百泉記畧 稿殘缺

十八日

思親亭考 共城人物載在壽書者男則高子子羔
女則共姜此一鄉領袖天下後世所瞻望者以其
姜有祠而高子無祠是亦缺典然高子祀於孔廟
矣俎豆在天下在萬世卽不祠不見少也若思親
亭者雖不可以例高子不可以無考考之以興孝

也亦所以崇許文正也文正時與門人知與登臨
歌咏於蘇山之巔歷多年所殺其子師可官衛輝
路總管時履其地而憶其親之語言行事恍若見
其親焉爲亭以寄所思亭在百泉之上聚遠亭之
前二亭俱廢獨有文正門人白僉事棟之記在夫
亭固師可之亭也而思親之心則天下人心之同
然也白子爲之記而思其師兼思其親淋漓蒸動
於筆下凡讀者莫不興起故謂思親亭不可無考
一考之而文正父子師弟之面目全呈亭已儼然
聳峙於蘇山之麓矣余因亭之廢也而考其故址

爲興孝之思又不能不致慨於忠烈士之無蹟可
考者史稱宗澤招太行忠義之士十數萬澤沒武
穆南渡所遺兩河忠義士避難山中有終元之世
未入版籍者予心欽其烈不能不憾於文獻之不
足耳

二十日

兩文正考 兩文正者耶律晉卿與許平仲也二公
前後居蘇門仕元功最大史載其詳姚文獻樞與
其姪燧子煒居輝以化民成俗子孫世爲輝人故
有專祠晉卿之遺蹟雖梅溪之名尙在而無片椽

以寄其憑弔平仲僅止有思親亭碑石在闔社繆
祠中碑云亭在晉卿祠東隅今兩祠俱無所存者
此一禍耳抑知兩文正之在蘇門固非尋常可比
擬也崔子銑之言曰元有三儒許平仲之興學耶
律晉卿之諫殺劉靜修之不仕三人而已夫學不
興則民彝亂矣殺不止則民命戕矣視化民成俗
於一鄉一隅者其功德當更何如三儒者所稱一
代之人傑終元百餘載而有三三百泉一片地遂
獲其二百泉亦幸矣哉靜修嘗有言怪得西山無
爽氣只因少我一茅廬則賢人於山水如人之有

骨山水於賢人如人之有眼眼與骨豈有待於人乎

二十一日

竹林七賢考 七賢者嵇康阮籍山濤向秀阮咸劉伶王戎也

二十二日

雜風議 有一代之風俗有一國之風俗有一隅之風俗山川所鍾毓習尚所漸摩久而無變相率遂成固然不知風俗亦何嘗之有以仁帥者以仁從以暴帥者以暴從姚許諸君子帥之之道也輝舊

志言君子崇尚禮文小人好飲而直婚姻喪葬有
相周之義續志言詩書經誦涵濡淡洽文物彬彬
視昔稱盛此或姚許諸君子化成之日乎今世

道喪淳風日漓非敢輕言俗澆爲姚許者正不容
自弛其維挽之責也夫道莫大於興孝興弟事莫
重於養生送死然此固人心之同然第不觸則不
見耳粵西孝子七千里徒步尋親一經拈出人人
有興孝之思吾鄉趙廷桂者一愚民耳曾剖骨愈
母疾子爲築廬以居一郭姓者請解衣觀之驚曰
爾於母如此耶小人與母時有觸忤今而後無敢

犯矣夫誰使之哉王老生者因飢寒而病病而死
其子若孫數口將爲溝中瘠借孫紹開一言而衆
爲賻之死得葬而生者免於飢寒某廣文老而無
子諸大夫食之衣之且時饗之以酒肉白溝張有
道客死亦諸大夫葬之題其塚曰遺民張果中墓
此數事在諸大夫無意爲姚許而實姚許化民成
俗之事予固曰風俗之倫有司與士大夫不能無
咎而深有慕於姚許諸君子故不能不致望今之
爲姚許者

救時議

王孝廉遵道之言曰輝邑昔稱豐富土厚

民洎士敦樸而鮮浮言民安樂而羞健訟前輩治
輝者止於卧理而有餘不則一蒲輒而無不足治
至於今大非昔比矣昔豐富今漸貧瘠矣昔安土
今漸流亡矣昔化國今漸愁民矣昔王勝客今客
役王矣昔甲不累乙今羊代牛死矣斯言也三十
年前病已先見昔所云漸者今成不返之勢矣客
役王愚另有譏羊代牛死當日不知何指今如豆
草號馬等類恰中其言夫豆草軍需所繫自宜銷
算正糧號爲額設有片豈宜重累里下今非不銷
算也而供草供豆之人不得蒙其利非有意遺累

也而買馬僱馬之役卻實受其害東支西補無所
不爲百孔千瘡由此而山子謂一事有一事之本
末當局者既非爲私橐之潤便當爲公溥之謀酌
事機之重輕量時勢之急緩合盤打算徹底澄清
務絕影射之姦痛懲貪頑之習庶甲不至於累乙
而牛可免於羊代語云琴瑟不調必解而更張之
乃可鼓也輝民此日憂深厝火痛比逸堂焚林而
獵今已不堪竭澤而漁後將安繼乎敬以質之仁
人君子

二十四日

荒田議 輝之四境獨西面遼濶遙望西山一帶翠
色撲人嘗聞步柳陰下小橋流水稻秀蓮實雖江
南不是過未幾淫雨漂沒連歲不登數里外一望
盡成茂草農人終歲勤動尙不能支而田既荒蕪
耕鑿無力租賦又復相迫勢不得不逃一家逃所
遺地極累及族屬族屬各不能自顧豈堪代人賂
累不能不與之俱逃逃亡愈衆而地之荒蕪愈多
有司按籍徵糧糧不能完則官受累那移補湊苟
且權宜迨至那無可那湊無可湊王令送以經死
具令又以變死嗟此二君其孰使之至此哉民窮

財盡荒地之累此其大端至閩縣之受累羊代牛
死者又不知凡幾也上臺諸公有軫念民艱方欲
入告除荒爲民請命轉盼間開荒之檄又下矣議
除者意在蘇民議開者意在裕國此固各有說焉
當救死不贍之時而責之以急公赴義之事民誰
與我豈意目前宜急議除荒荒除矣則民之復業
者必衆復業者衆則荒不期開而自開民與國兩
有利焉望當路之仁人君子以一身一家視之同
心以救此一方民瘼事廢乎其可爲也

貢院議 入蘇門紀事

二十八日

輝邑西有白雲寺佛剎幽鉅泉冽而林鬱遊人往往稱之余舊於文安王孝子尋父過於此寺而海內因是皆知白雲之名顧地洵借人以靈哉

王原文安人父珣以不能支門戶迹跡輝縣之夢覺寺依法林長老二十餘年原幼不識父面甫受室即別母尋訪其父數年歷盡艱苦相見號泣挽歸一家相聚可謂誠孝之心無忝所生矣

二十九日

德君孫先生考終錄

趙御衆

門人鍾國士較輯

後學王 輅

第四孫 淳

同錄

九世孫世玟

御衆 仲春望後過夏峰候

先生函丈晚侍食 先生能飲酒食肉但音聲不甚爽

亮似痰在喉吻間未敢有請罷歸寢所次早 先生

盥沐畢呼 御衆 至座前日汝如許年來磨鍊過亦不

易到此向後當更勉之 說可欲之謂善章其畧云

人性本善自形隔氣分而重之以習非學無以復性
只爭有諸已無諸已是分途處千聖萬賢都從有諸
已三字立基惟有諸已則天理必存人欲必去乃日
積月累至于充實田地狀充實猶可爲也充實之極
則資深而左右逢源至於光輝將見睥面盎背有厥
有儀出於自然不可爲也孔門冉閔也到充實田地
顏曾便到光輝田地若化若神非老夫子不能答夫
子毀溺人之盟入衛子貢疑之子曰要盟非誠也此
便是夫子精義入神聖不可知處若以神爲幻渺不
可測識如世人所謂鬼神之神失之遠矣起手是有

諸已到了手仍是有諸已亦曰熟之而已矣

御泉側

聽教誨亦以爲誨人不倦如平時提撕耳及渡河而南忽接四月廿一日訃音始痛前此之言是徹底打開皆永別遺訓語也踉蹌奔哭已成莫追所幸先生第四孫潛及同學鍾子國士自初疾至屬纊一言一動皆從備記錄因得其爲訂輯彙成一帙見先生於生死委順之間爲不愧不怍之實際名曰考終錄云

歲乙卯三月

先生偶感風寒遂不甘食雖飲酒少許一日假寐覺曰

適夢高薦馨來爲吾拜喜且曰先生已得官矣薦馨
吾老門生作古年餘今謂吾得官其歲在龍蛇之兆
予因手書曰譜中云學問以了達生死爲極詣狀世
之所謂了達生死者輕生輕死非真能了達生死也
真能達生死者則生不徒生而生足取重於世死不
徒死而死足取重於世聖門諸賢顏子克復而天下
歸仁一聞視聽言動之目則請事斯語由雖在四友
六侍之列狀未知生焉知死如由也而能承當夫子
必不曰不得其死狀了達生死者必不能忘吾父母
所遺之體目能視視還明耳能聽聽還聰口能言言

還從四體能動動還理是之謂天下之大孝唯天下
之仁人乃能爲天下之孝子言使自重其父母之所
遺也 至十二日又手書日譜云吾十有五章是夫
子自書年譜也孟子願學孔子可欲之謂善章是孟
子爲孔子寫神也可欲之善是孔子志學之矩也有
諸已則立矣充實之美則不惑矣充實而有光輝則
天命流行有威有儀矣大而化聖而不可知則耳順
從心矣由仁義行非行仁義也非孔子孰能當此而
快愉乎余謂充實可爲也光輝不可爲也所儀在學
修恂慄之後我輩爲學亦只在立與不惑上著手下

學而上達在其中矣 十七日又手書朱陸流弊一

則於日語中

朱陸流弊先生嘗言之矣於此又諄諄言者恐人不識朱遂不識陸耳他冊已

詳故

不錄 十九日親承李梅村公令其子對來贊因請學

問入門先生答云君家庭訓得之極真今益以一言

學而時習悅樂不愠所以存養此心勿令之放也聖

門學問窮夫摠之是求仁語類子克復而天下歸一

歸不復違則心存而不放存誠以開邪也須從深造

自得則居安資深而左右逢源所以忘憂忘食而危

老日月之至至之時依然仁也而至之前至之後非

取仁則襲義耳豈可與終食不違者同日語哉陽明

之言曰諸公在此講學忘到底成一個義襲而取羅
念菴痛除將就冒認正是對症請以質之庭訓二十
四日先生第十二孫濂乳名桐哥以脾病久忽感傷
寒嘔血瘍先生痛悼不禁因手書數言於譜中云四
孫一曾心童子試當赴府沐浴孫以其弟濂久困
於病不忍去老夫聞而喜曰不去勝去是日遂殤此
兒雖十一歲儼如成人能行文愛親從兄孺慕正切
老夫薄德慧者天亡夫復何言明日以下殤禮葬之
先生是日至二十八日門人鍾國士自覃懷歸入拜
飲食愈少先生曰爾徒桐哥竟死矣飯至不舉七國士含淚不
先生曰爾徒桐哥竟死矣飯至不舉七國士含淚不

政荅隨退 二十九日王溫石自潁州歸持其父惠
航公與先生書讀之甚喜 王獻甫寄書爲其父五
修求傳先生諾之 三十日晚先生體忽寒熱傾之
汗出至四月初一日有客問禪多妙旨先生應有所
得請求指示先生曰近得一語實爲要訣但未敢指
以示人容再拜請荅曰許平仲能化老僧還俗此語
通徹天德王道一齊了貫亦不必迷亦不必歸抱此
人倫日用世界共游于光天化日之下豈非絕妙要
訣乎先生自是日遂不粒食諸子及孫曾等皆侍寢
二日衛輝太守程公念伊送郝公雪海手書自遠

東至先生手跋數行云老夫日益衰天地生生之氣
不以違阻不以老閒千古聖學皆本諸天我輩果信
得及無在非光天化日便省許多葛藤矣自是日常
吟旅館寒燈獨不眠與月落烏啼霜滿天二絕句

四日劉心六在聯壁郭公望周顯承四先生來視疾

榻前不能多言猶出灑承李梅村公手書與曰先生

講論

先生自絕粒後氣雖弱每早必
溫沐惡凡少時至屬穢不廢

五日門人王柔

來視疾先生云病棘矣柔診脈曰無妨先生曰氣弱

六日鍾國士至榻前省問先生命看夢肅雪海雨

公手書云此正好驗學問得力處 七日曲周王廣

生名體健。揭門人申涵光札來。贊是晚先生次孫。淫亦自汴歸。先生甚喜。乃進所攜梨膏等物。食皆不甘。八日晨起坐口。授與廣生一則云。君篤信虛衷。不達數百里。見顧老夫。因憶在江村時。得交令先君子。去冬雨雪。次公中翰在視夏峰。三世交情。儼在目前。自顧老病。數日不能飲食。遂不能與之言。念學問在窮。不在口區區一得之見。只隨時隨處體認天理。此外更無他說。我輩試自認如何。是天理。天理是如何。體認則一切可相忘。於無言矣。授言畢。淫乃前致云。昨在汴。晤方邵村。且語淫。仰候至意。先生云。邵村爲

謹啓云是坦菴先生之工先生云他是左浮丘家人

九日門人崔蔣村自都門寄書至乃令一孫口誦

尋復索親視之

十日袁太徵先生復來視疾

按先生自

感疾來皆仲子奏雅與袁先生商訂方劑奏雅精醫
理以先生臥有入秋脾胃之症因殫力于岐黃先生
每達和服其藥輒效至是見先生病作不敢據已見
恐誤乃與袁先生斟酌焉先生氣益弱

從此日後遂不能下牀狀每晨猶必盥沐令人扶起

坐移時雖便溺亦必令扶掖下榻其不苟如此十

一日邑侯周公遣使來問疾

十二日又遣使來問

是日冀渭公先生扶病來視疾 繩丞李梅村公以

書來問疾 十三日邑侯周公太翁偕其孫偕劉長

人亦視疾太守程念伊公遣人來問疾 十四日蘇
環中先生令其子姪來問疾復寓書相候並訊及蘇
門社文 十五日門人耿極自同隆來省疾先生以
不畫其掌作字不能辨乃命筆書緒云吾將近矣此
後勉之全在爾等勿讓人肩師率父顯祖古公大題
目須自己做一番 十六日病愈篤自絕粒食來唯
日飲圓眼湯梨汁數匙雖氣弱不能大言狀神理如
平日適門人郭遇熙來省疾命筆稀書示云保汝在
此勉之非可讓人也既又執遇熙手畫掌中千秋二
字 河道彭悟山公遣人來問疾 十七日諸孫環

侍額注至前令去帽以手拍其頂云勿外道因以手

書其掌中云○○○線夫子之教○孝○○○多此

一○不可不知

所書字有不識者不敢再問記之以因即可識之字以會意可也既

又示長公立雅云你自是一個人要小心又書江村

二字

江村鹿伯順先生也立雅爲受業高第

示泰雅云有○用示望雅

尚雅云第七○○○大父○○○之力示博雅云八望

然甚切示韻雅云第十一汝是個好男子勉之鬼神

不負汝也又示諸孫輩云孫潛有志又呼慶哥及曾

孫椿齡云輩勿負汝祖不必我一一戒也程太

守公念伊復遣人來候轉致直隸督學王涓來先生

相尚原札中有云孫徵君尚鑒錄如舊碩果不盡使
入景仰附此幽懷以志所思先生著書多種弟雖人
竊望盡見寄以爲帳中之秘乃以家刻三種付之十
八日晨刻云病日已矣扶我起爲我拭沐具衣冠當
把酒少酌送我觀化門人暨諸子孫皆婉言慰留先
生首肯一時熟睡及覺侍側者曰適尹芝仙喬梓來
視疾方出門矣先生曰我欲會你尹先生急遣使請
問曰再無相會之期矣爲我幸致周太公 王枚卜
來盡其掌云勉力好做法又盡和藪奇掌云老弟于
勉 十九日先生云子靜時令衆人俱退靜以休

息是學問實際乃披衣起坐片時自吟旅館寒燈獨
不眠之詩復微笑云眠的化爲不眠不眠的化爲眠
二十日晨刻先生云病來心中煩熱不得爽快穩
睡明道云人有四百四病由不得自己是心須教由
自己因恐博雅手云你們不省我心裏從何處做功
夫是日沈日雨尊得相露一瓶進之先生三服和一
既許覺喉中頓爽肤氣愈弱矣 二十一日素雅診
脈甚平和唯左手三部微細已極扶坐片時午刻命
服衣加冠勿驚擾忽門人韓繼業來視疾先生正正
彌五猶執其手曰子新子新侍榻者恐增感觸令之

退之傾先生自視手足正襟遂瞑目長逝矣是爲乙
卯四月二十一日未時嗚呼山頽水壞誰能不悲哉
先生捐館客後三日方殮顏
色如生四肢柔和人皆異之

是以復性爲宗先生九十二年著書不下百萬餘言
無非上傳孔孟下接洛閩與天下後世究竟此學而
無如學者終日體性而不見性則虛無高妙之論害
之耳今所記錄先生言動眠息僅月餘事善觀者卽
先生之百萬餘言矣夫病中指示物至酬裁言簡意
厚真精盡注是先生與善之誠出於自朕也詎子若
孫輩夜環侍藥嘗而進粥檢而哀是膝下克孝之善

致於自狀也賢大夫之存問鄉先生之省候以及親
養生徒視榻不俟是在人而善之心發於自狀也孟
子曰天下之言性也或而已矣故者以利爲本又曰
所惡於智者爲其鑿也不鑿者自狀之謂也外自狀
而言性全施以言道也則人生而靜以上不容說者
也是錄也見先生與人無非率性而已矣自毫末性
自全其天晝夜之道通焉夫何生死之足云嗚呼一
息尚存此志不容少懈若先生者乃所謂考終命者

與程朱教讀

日譜錄存卷之三十六終

學曉庵表裏

酌堂先生齊政

跋

同治甲戌廣平武酌堂前輩約同志列具卷先

日譜行世先生裔孫士佩所著

角時見先仲兄華峯日記所作氏

以為無弱冠就外傳先李丹樵師

日頂路上用單行細楷撮舉一日言

省如無言可紀即於是日書虛度二字見

小前先生日譜也今前

學使

之士先親為快伏願讀是書

所知以省吾身一脚踏實

即自棄筆而書之以不負先生守

筆怡悅持贈之盛情則家置一

仲兄名澤原膳生丹桂

居教授以終皆先生

不朽云鄉晚潞河

承光得惠

謝